

四庫全書

子部

欽定四庫全書

子部

同姓名錄卷七

詳校官中書

臣孫球

主事

臣祁韻士覆勘

覆校官中書

臣

汪學金

校對官原任典簿

臣

郭祚熾

膳錄監生

臣

金國禮

欽定四庫全書

同姓名錄卷七

明 余寅 撰

侯瑾二

後漢侯瑾敦煌人孤貧篤學傭作為資暮還輒爨柴讀  
書州郡公車徵並不赴入中山覃思著述案漢記中  
興以後事撰皇德傳三十篇行於世

後涼侯瑾能解鳥語呂光大安三年嘗出門見白雀巢  
陽川與黑雀列行歎曰今天下大亂君子小人共居

遂去不知所之見後涼錄

竇憲二

漢竇憲竇融曾孫以車騎將軍出塞大破北單于斬名王已下萬三千級降者二十餘萬人拜大將軍封武陽侯

隋竇憲竇榮定之子榮定以佐命勲拜上柱國進爵安豐郡公又以擊卻突厥功復封憲為安康郡公賜縑五千疋

姚光二

漢元初五年句驪與濊貊寇玄菟太守姚光將兵出塞擊之捕斬渠帥大獲兵馬財物

吳姚光有火術孫權親試之積荻數千束使光坐其上又以數千束裹之因猛風燔荻謂光當化為燼而光端坐灰中振衣而起把一卷書權取視之不能解也見抱朴子

王謙二

後漢王謙司空王暢之子為大將軍何進長史進以謙名公之冑欲與為婚見其二子使擇焉謙弗許以疾免卒於家

北周王謙大將軍王雄之子襲爵庸國公為益州總管隋文帝輔政謙以父子受國恩將圖匡復舉兵攻利州衆潰被害

陳宗二

班固撰前漢史或上書告固私改國史者顯宗見其書

甚奇之召詣校書部除蘭臺令史與前睢陽令陳宗  
共成世祖本紀宋永嘉陳宗年十六母病篤刲股為  
餌病愈已而復病不救宗一慟而絕郡守陸德興官  
為造葬榜曰陳孝子墓

徐嵩二

後漢徐嵩靈帝時為益州太守坐賊繫獄御史按之嵩  
搗額乞憐密以千金行賂免死戍雲中見天祿閣外  
史

前秦徐嵩符堅時拜鎮軍將軍雍州刺史姚方成攻雍州執而數之嵩厲聲責其大逆使速殺已方成怒立斬之

馬遵二

後漢馬遵順陽侯馬廖之子嗣爵徙封程鄉侯

宋馬遵景祐進士歷侍御史吏部員外郎直龍圖閣立朝侃侃遇事規切

夏方二



後漢夏方九江人為交趾刺史日南蠻夷攻燒縣邑扇動九真方開恩招誘賊皆降服梁太后美方之功遷桂陽太守

晉夏方永興人家遭疫癘父母伯叔羣從死者十三人方年十四夜則號哭晝則負土十有七載葬送始畢因廬墓植松柏烏鳥猛獸馴擾其旁

## 高祚二

漢建安末曹操征張魯攻之不能拔密遣將軍高祚乘

險夜襲大破之魯遁奔巴中

北魏高祚脩人襲父讜脩縣侯爵為東青州刺史

劉瑜三

後漢劉瑜廣陵人舉賢良方正拜議郎竇武欲誅宦官引為侍中與同謀畫武敗被誅

南宋劉瑜歷陽人十歲喪父繼又喪母三年不進鹽酪號泣不絕聲力營葬事服除二十餘年布衣蔬食言輒流涕常居墓側未嘗暫違

金劉瑜棣州人家貧甚母喪不能具葬乃質其子以給喪事明昌三年詔賜粟帛復其終身

馮伉三

漢馮勤祖父偃長不滿七尺常自恥短陋恐子孫之似也乃為子伉娶長妻伉生勤長八尺三寸光武時為司徒賜爵關內侯唐醴泉縣令馮伉博學有才韋渠牟薦為給事中充皇太子侍讀召見賜金紫著三傳異同三卷宋馮延魯之子伉文辭清麗嘗著平晉頌

時人稱之第進士歷典藩郡皆有治迹

張曜二

後漢張曜太尉張禹小子禹卒安帝除曜為郎中令

北齊張曜昌平人天保初為尚書右丞文宣近出令曜  
居守帝夜還駐驂催迫曜以夜深須火至面識門乃  
可開於是獨出見帝帝笑曰卿欲劾郅君章也曜前  
開門然後入帝嗟賞賜以錦綵

樊毅二

漢樊毅為弘農太守復華下民租光和二年立碑在華  
陰縣見分韻

陳樊毅太建中為左衛將軍以北伐功多為荊州刺史  
封逍遙郡公

李恂二

後漢李恂習韓詩教授數百人徵拜謁者領西域校尉  
北匈奴數斷車帥伊吾以西使命不得通恂設購賞  
斬虜帥縣首軍門後坐公事免步歸鄉里結草為廬

與諸生織席自給

西涼李恂李嵩之子為燉煌太守嗣主李歆為沮渠蒙遜所害郡人推為冠軍將軍涼州牧蒙遜復率眾來攻城陷自殺

王暢二

漢王暢太尉王龔之子為南陽太守慎刑簡罰教化大行郡中豪族奢靡相尚暢常布衣皮褥車馬羸敗以矯其弊

晉王暢嘗出使西域還言足彌山有石流黃高數十丈  
從廣五六十畝晝視孔中狀如烟夜視如火光國中  
時氣不和皆往保此山見博物志

任峻二

漢任峻勃海人永平中補洛陽令擢用文武吏皆盡其  
能糾剔姦盜不得旋踵一歲斷獄不過數十終於太  
山太守

魏任峻中牟人從曹操為典農中郎將募民屯田許下

軍國之饒起於棗祗成於任峻

後漢兩趙彥

一琅邪人少有學術延熹三年太山賊攻沒琅邪詔以  
宗資為討寇中郎將督州郡合討彥陳孤虛之法發  
五陽郡兵從孤擊虛一戰破賊徐究悉平

一建安末為議郎陳言時政曹操惡其忠直殺之見伏  
后紀

杜弘三



東漢杜弘穰人率衆從岑攻南陽下數城與耿弇戰  
於穰敗降見耿弇傳

晉杜弘據臨賀謀反廣州刺史陶侃擊破之

南燕杜弘仕慕容德為從事中郎德母在長安遣弘存  
問消息弘請以死自效至張掖為賊所殺德聞而悲  
之厚撫其家

劉翊二

後漢劉翊潁川人守志卧疾不屈聘命獻帝特拜議郎

遷陳留太守敝車羸馬自載東歸見士大夫病亡道  
次翊以馬易棺脫衣斂之又逢知故困餒於路不忍  
委去因殺所駕牛以救其乏衆人爭之翊曰視沒不  
救非志士也遂俱餓死

宋劉翊靖康初為真定路都鈐轄金人攻真定翊率衆  
晝夜搏戰城陷挺身潰圍之孫氏山亭解條自縊

王諶二

後漢王諶河南尹田歆外甥名知人歆謂曰今當舉孝

廉欲用名士以報國家爾助我求之明日諶送客遙  
見种嵩異之還白歆即召嵩舉孝廉

南宋王諶東海人博學有節義歷東觀祭酒太子中庶  
子少貧常自紡績及通貴每對人言之世稱其達

張邈二

後漢張邈壽張人少以俠聞曹操袁紹皆與為友由騎  
都尉遷陳留太守董卓之亂首舉義兵後背操詣袁  
術為下所殺

晉張邈為郡功曹奉使詣州夜夢狼啖一脚就索統占之統曰脚肉被啖為却字會東虜反不果行

李雲三

後漢李雲甘陵人桓帝時為白馬令中常侍單超等封侯專權又立掖庭民女亳氏為皇后后家封者四人雲路布上書帝震怒逮雲下獄死

後蜀李雲偽主李雄從弟初為建威將軍及雄僭稱成都王以雲為司徒見蜀春秋

唐宗室李雲嗣封敷城郡公

謝端二

漢謝端閩人嘗得一大螺如斗畜之家每歸盤餐必具  
因密伺乃一姝麗甚問之曰我天漢中白水素女天  
帝遣我為君具食今去留殼與君端用以居糧其米  
常滿見搜神記

元謝端遂寧人弱冠師王奎文明性理之學善為古文  
累官翰林直學士朝廷制冊多出其手時稱有良史

才

秦松二

吳秦松廣陵人建安初孫策自領會稽太守以松等為謀主見張紘傳

北魏秦松宣武時宦者位至長秋卿見恩倖傳

趙祗二

後漢趙祗涼州人與逆賊馬相等起於綿竹自號黃巾聚眾萬餘攻破益州三郡州從事賈龍擊走之

唐趙祗趙隱之祖朱泚之亂德宗幸奉天祗以家人奴  
客奮力拒守獻家財助軍天子嘉之辟為推官累遷  
工部侍郎出為嶺南東道節度使

陳珪二

漢沛相陳珪嘗舉華佗孝廉見華佗傳

魏司馬陳珪從大將軍司馬懿討遼東太守公孫文懿  
珪進速攻之計懿故緩之以俟其怠

陰興二

漢陰興光烈皇后母弟有膺力為黃門侍郎從征伐平定郡國賜爵關內侯帝疾受顧命於雲臺廣室

北涼陰興燉煌人與劉昺並以文學稱為主沮渠牧犍尊昺為國師興為助教命官屬以下皆北面受業見北涼錄

曹訓王磐各二

東漢曹訓馬援姊子援因兄壻王磐游京師與衛尉陰興等相友善嘗與訓言其必敗後磐果預蘇業事連



坐死洛陽獄

宋曹訓初知袁州除姦暴免和糴甚著政績後除直閣

知閬州

元王磐至大進士大肆力於經史百氏文辭宏放中統  
間為真定等路宣慰使人為翰林學士太常少卿每  
奏對必以正始終眷顧不衰

李章二

後漢李章懷人建武中侍御史出為瑯邪太守北海大

姓夏長思等反章即發兵馳擊之掾史止章不得出界不得擅發章云坐討賊而死不恨遂引兵與戰斬之獲三百餘級

南唐李章起家騎將累遷雄武軍都虞候出為虔州節度使老而心壯善撫士卒勤於職務

劉政二

後漢劉政宗室河間孝王之子既嗣位傲很不奉法順帝擢侍御史沈景為河間相到國責王傳無訓導之

義因奏治罪詔書讓政而詰責傳政遂改節自修

金劉政洺州人性篤孝母老喪明政以舌舐目逾旬而  
能視母疾刲股肉啖之者再三及死負土起墳葬之  
日飛鳥哀鳴翔集丘木防禦使以聞除太子掌飲丞  
張顯二

後漢張顯元初中為漁陽太守鮮卑入寇率吏士追擊  
出塞伏兵發射死見劉茂傳

西涼張顯深泉人有遠量武昭王據有西夏引為功曹

甚器異之位至酒泉太守見北史張湛傳

高詡二

後漢高詡平原人以父任為郎中世傳魯詩建武末官至大司農在朝以方正稱

前燕高詡遼東人善占天文建武初慕容廆稱大單于詡杖策見之言當遣使江東示有所尊廆善之拜郎中令遷玄菟太守以平征虜仁功封汝陰侯

光武時兩馬成

一棘陽人拜揚武將軍擊李憲平江淮破隗囂平武都  
累進大司空封金椒侯

一建武二十四年虞延為洛陽令外戚陰氏有客馬成  
常為姦盜延收考之陰氏屢請獲一書輒加笞二百  
信陽侯陰就譖延多所冤枉帝乃親錄囚徒知延不  
私遂誅成

許慎二

漢太尉南閣祭酒許慎作說文解字六藝羣書皆訓其

意天地鬼神山川草木鳥獸蟲魚雜物奇怪莫不畢載

唐學士許慎與親友宴花園中聚花鋪座曰吾自有花  
裊何消坐具見開元天寶遺事

劉愷二

後漢劉愷居巢侯劉般長子當襲爵讓與弟憲遁逃避  
封積十餘歲聽憲嗣爵徵愷為郎官至太尉在位者  
莫不仰其風節

南宋劉愷宗室南郡王義宣之子別封宜陽縣王義宣  
反并誅

張濟張根各二

後漢張濟司徒張酺曾孫好儒學官至司空及卒靈帝  
以舊恩贈車騎將軍關内侯追濟侍講有勞封子根  
為蔡陽鄉侯

後魏張濟西河人涉獵書傳清辯善儀容道武愛之使  
為行人拜散騎侍郎襲爵成紀侯

宋張根第進士為淮南轉運使加直龍圖閣上書屢忤權倖被貶安置郴州性至孝父病蟲戒鹽根為食淡母病每至雞鳴則少蘇後不忍聞雞聲

王政二

漢光和中漁陽張純反所至殘破幽州牧劉虞購純逃入鮮卑其客王政殺之送首詣虞封政為列侯見公孫瓚傳

金王政熊岳人天會初侍衛親軍都指揮使兼掌軍資



時軍旅始定吏皆因緣為姦政獨明會計嚴局鏹金帛山積而出納不爽鎰銖

李嵩三

後漢魏郡李嵩為美陽令貪暴為民患督郵蘇謙案得其臧論輸左校謙後免官歸里私至洛陽時嵩為司隸校尉收謙詰掠死獄中又刑其屍以報昔怨見蘇不韋傳

晉李嵩成紀人學通經史頗習兵法嘗與郭麀同宿麀

曰君有國土之分家有駟草馬生白額駒此其時也  
後數年白額駒果生晉昌太守唐瑤移檄六郡推髡  
為大將軍涼公秦涼二州牧

唐李嵩宗室清河王孝節之孫少孤事母甚謹居喪柴  
毀家人未嘗見其言笑開元末官至兵部尚書太子  
少傅封武都縣伯

徐宣二

後漢徐宣中常侍徐璜族子為下邳令暴虐尤甚東海

相黃浮收宣案罪棄市見單超傳

魏徐宣海西人為尚書左僕射封津陽亭侯立朝忠亮  
文帝稱為社稷臣

劉祐三

後漢兩劉祐 一即安帝 一安國人桓帝時河東太  
守政為三河表再遷司隸校尉威行朝廷以疾辭歸  
杜門絕迹

隋劉祐滎陽人開皇初為大都督封索盧縣公其所占

候合如符契文帝甚親之嘗奉詔撰兵書名曰金韜  
復著陰策觀臺飛候等書並行於世

盧植二

後漢盧植涿人少事馬融學通古今建寧中徵為博士  
黃巾賊起四府舉植才兼文武拜北中郎將發諸郡  
兵征之連戰破賊斬獲萬餘

元楊文安為開達等處招討使軍於巴渠宋萬安寨主  
盧植來降遂築蟠龍城以據夔達要路

王脩四

漢王脩漢安二年為鄆令時軍人殺歷陽太守伊曜脩  
誓衆奔入賊營取曜屍葬之人服其義

魏王脩營陵人七歲喪母母以社日亡來歲隣里社脩  
念母哀甚隣里為之罷社後為大司農郎中令

晉王脩王濛之子明秀有美稱年十二作賢全論以示  
劉惔曰此論便足叅徵言官中軍司馬卒年二十四

南宋王脩武帝時為安西長史從桂陽公義真鎮長安

及沈田子殺王鎮惡脩報田子以專戮斬之

趙炳二

後漢趙炳東陽人善方術以氣禁人人不能起禁虎虎  
伏地低頭閉目便可執縛見抱朴子

元趙炳灤陽人為刑部侍郎濟南妖民作亂加昭勇大  
將軍濟南路總管炳至止罪首惡餘黨悉平

韓演二

漢韓演韓校之孫官司隸校尉中常侍左官以誅梁冀

功封侯驕恣亂政演奏愴罪惡愴自殺

北周韓演韓襄之父恒州刺史

劉協二

漢獻帝名協

北魏劉協饒安人節閔時高昂起兵輔齊神武協聚衆  
附昂為羽翼位至大丞相司馬坐事死

李勝二

後漢李勝廣漢人有文才為東觀郎著詩誄頌論數十

篇

魏李勝正始元年為河南尹以黨曹爽被誅

王承三

後漢王承初平中為池陽守將時西州饑征東將軍馬騰表求就穀承恐騰為已害乃攻騰破走之

晉王承王湛之子清虛寡欲憂喜不形於色為元帝鎮東府從事中郎甚見優禮渡江名臣王導衛玠之徒皆出其下為中興第一



梁王承王曇首玄孫好儒業為國子祭酒祖儉父暕皆居此職三世為國師前代未之有

周廣三

漢延光三年侍中周廣等共讒陷太尉楊震震自殺

晉元帝命揚烈將軍周訪領兵討華軼軼將周廣燒城應訪軼衆潰被斬遂平江州

宋開寶六年命周廣為右屯衛大將軍領潘州團練使訓練雄武諸營

郭弈二

後漢陰瑜妻潁川荀氏年十九而瑜卒誓以死守後同  
郡郭弈喪妻其父強之適郭入室掩戶書扉上曰屍  
還陰遂以衣帶自縊

晉郭弈陽曲人高簡有雅量太康中雍州刺史徵為尚  
書弈有重名當時朝臣皆出其下

劉恭三

東漢兩劉恭 一明帝第四子封彭城王食楚郡敦厚

威重舉動有節度吏人敬愛之立四十六年薨一更  
始時為侍中赤眉入長安更始遣恭請降封畏威侯  
恭固請得封長沙王

北周劉恭長廣公劉亮次子以父功授開府儀同封饒  
陽縣伯

東漢兩趙博

一肅宗詔諸儒於白虎觀論考五經同異博士趙博校  
書郎班固等並與選見楊終傳

一和帝延平元年西域諸國反叛詔騎都尉趙博等將河西四郡兵追擊大破之斬首萬餘級見梁懂傳

王廣三王燾二

後漢王廣山桑侯王常之子常薨嗣侯徙封石城

晉王燾丞相王導曾孫襲爵始興郡公尚鄱陽公主歷中領軍尚書

前趙王廣仕劉淵為西揚州刺史蠻賊入寇攻圍一百二十日外救不至城陷被殺將士不忍獨生相枕而

死者五十人

後趙石虎遺蜀李壽書欲連橫入寇約中分江南壽大  
悅遣散騎常侍王嘏中常侍王廣使於趙

李邵二

後漢李邵南鄭人通五經善河圖風星舉孝廉五遷尚  
書令元初中為司空數陳得失有忠臣節

唐李邵延唐人太和初擢進士第一同榜蕭倣崔慎由  
崔鉉後並為相今縣有李狀元祠

孔嵩二

後漢孔嵩南陽人家貧親老乃變名姓傭為新野街卒  
正身厲行街中子弟皆服其訓化遂辟公府官至南  
海太守見范式傳

五代孔嵩蜀人善畫師刁處士嘗於廣福院畫龍一堵  
蜿蜒怪狀不與常同逼視遠觀勢欲躍躍時人異之  
見益州畫錄

劉和三

後漢兩劉和一宗室彭城頃王之子元嘉初嗣立性

至孝太夫人薨行喪陵次毀齒過禮傳相以聞桓帝

詔迎王還宮一太尉劉虞之子獻帝時為侍中在

長安帝思東歸使和潛出武關詣虞使將兵來迎

前趙劉和偽主元海之子及嗣偽位使衛尉劉銳攻鹿

蠡王聰聰貫甲攻西明門剋之斬和於光極西室

## 楊仁二

後漢楊仁閬中人舉孝廉除郎顯宗特詔補北宮衛士

令及帝崩諸馬貴盛各爭欲入宮仁被甲持戟嚴勒門衛莫敢輕進者

金哀宗天興元年元兵攻汴城遣戶部侍郎楊仁奉金帛詣元兵乞和

陳襄二

後漢安帝永寧元年十月衛尉廬江陳襄為司空

陳武帝踐祚廣封宗室詔從子北徐州刺史襄封鍾陵侯



周興三

漢周興山陽太守周榮之子以父任為郎中博物多聞  
有雅才永寧中尚書陳忠上疏薦興懷竒抱能隨輩  
栖遲誠可歎惜詔拜興尚書郎

晉武帝太康元年王渾克吳尋陽諸城獲吳威武將軍  
周興

唐周興長安人以明習法律歷司刑少卿秋官侍郎自  
垂拱以來屢受制獄被其陷害者數千人天授元年

下獄徙嶺表為讐人所殺

馮定二

一漢馮魴之孫嗣爵楊邑鄉侯官至羽林郎將

一唐馮宿之弟擢第累太常少卿總樂工閱於庭文宗見其端凝若植問知是定乃召昇階錫禁中瑞錦仍令大錄所著古體詩以獻

劉豹三

後漢宗室劉豹永嘉元年嗣立為淮陽王又建安二十

五年魏文帝稱尊號或傳漢帝遇害先主發喪制服  
故議郎楊泉侯劉豹等請先主即尊位又前趙劉豹  
劉元海之父為匈奴左賢王魏嘉平中祈子於龍門  
有大魚頂有二角軒髻躍鱗來至祭所其夜夢所見  
魚變為人左手把一物大如雞子光景非常授呼延  
氏曰此是日精服之生貴子自是十二月而生元海  
張雲二

後漢張雲為豫章太守舉陳重孝廉重以讓其友雷義

前後十餘通記雲不聽

唐張雲著咸通庚寅解圍錄一卷見宋史藝文志

李燮二

後漢李燮李固之子固既誅燮入徐州界燮名姓為酒家傭十餘年遇赦還鄉里徵拜議郎再遷河南尹在位廉方自守舍短取長好成人之美

北魏李燮官京兆尹吏民愛敬歌曰恩如春威如虎愛如母訓如父

陳忠二

一後漢司空陳寵之子歷廷尉尚書令有聲稱安帝立  
上疏薦隱逸有道之士嘗作搢紳先生論以諷中侍  
王伯榮負寵驕蹇之過

一有元開封尹陳祐之祖博究經史鄉黨皆尊而師之  
既歿門人謚曰茂行先生

劉敏三

東漢劉敏光武叔父弘之子建武二年封甘里侯通經

有行官至越騎校尉

蜀漢劉敏後主時為左護軍揚威將軍鎮漢中魏遣曹  
爽襲蜀議者但欲城守敏謂男女布野農穀栖畝必  
不可聽敵入遂率衆據興勢魏軍引退以功封雲亭  
侯

元劉敏青魯人從太祖征遼西回回諸國悉收其地立  
兩軍戍燕置二總管府以敏二子為二府長命敏總  
其役賜玉印佩金虎符

孫嵩二

後漢孫嵩安丘人藏匿趙岐得免唐珣之難後岐為太僕使荊州時嵩亦寓於劉表岐稱其素行篤烈因共上為青州刺史

宋孫嵩休寧人容貌怪竒趣尚幽潔以薦入太學宋亡歸隱海寧山中誓不復仕杜門賦詠淒斷淪絕以寄其沒世無涯之悲

漢兩朱普

一九江人習歐陽尚書為博士桓榮師事之後普卒榮  
奔喪九江負土成墳

一廣都人為郡功曹太守與刺史王冀有隙枉被誣劾  
普詣新都獄掠笞連月肌肉臭腐卒證太守無事勅  
其子曰我死載喪詣闕使天子知我心

劉玄二

後漢劉玄即更始將軍

蜀劉玄昭烈帝之曾孫東遷洛陽值永嘉大亂劉氏子



孫絕滅惟玄奔蜀李雄署為安樂公以嗣後主

楊政二

後漢楊政京兆人從代郡范升受梁丘易善說經書教授數百人京師為之語曰說經鏗鏘楊子行

宋楊政臨涇人興元中為熙河蘭鞏路經略安撫使知利州會金人渝盟政率師趣渭水以拒敵衝凡大戰七斬獲甚多

後漢兩耿忠

一耿弇從子嗣封興義侯以騎都尉擊匈奴於天山有  
功

一耿純曾孫嗣封高亭侯

王康三

東漢兩王康 一永平十二年十月司隸校尉王康下  
獄死 一安帝時中黃門自太子廢為濟陰王常懷  
歎憤及帝崩康與孫程等斬江京閭顯迎立濟陰是  
為順帝詔封康華容侯

北周王康大將軍王悅之子司邑下大夫恃勢驕縱所部軍人將有婚禮康非理陵辱軍人訴之悅及康並坐除名

周勰二

漢周勰光祿勳周舉之子以父任為郎自免歸舉孝廉又公車徵固辭廢疾常隱處竄身慕老聃清淨杜絕人事十有餘歲卒時年五十蔡邕以為知命

晉周勰南郡太守周玘之子為臨淮太守常緘父將終

之言欲誅讐人因吳興徐馥有部曲潛與結約馥殺太守袁瑒奉其叔父札為主札大驚斬馥總為札所責失志而卒

劉方二

後漢永元中舉孝廉大郡小郡各二人和帝以為不均詔司空劉方與公卿會議見丁鴻傳

隋文帝遣驩州道行軍總管劉方經略林邑師至其國林邑王梵志聞其威名棄城奔海獲其廟主金人汗

其宮室刻石紀功而還

楊統二

後漢楊統新都人得祖傳祕記學習圖讖及天文推步之術建初中為彭城令朝廷災異多以訪之位至光祿大夫為國三老

北涼楊統初為南涼西郡太守沮渠蒙遜攻統於日勒統降拜為右長史寵踰勲舊

李淑四

後漢李淑豫章人更始時為軍師將軍見更始所授官爵皆羣小賈豎上書切諫更始怒繫淑詔獄自是關中離心四方怨叛

唐李淑憲宗之孫河內郡王

宋兩李淑 一渤海人淳化中博士進事類賦百篇於朝太宗嘉其精贍因命注釋擢水曹郎

一李若谷之子真宗時為翰林學士博習諸書詳練典故凡有沿革帝多咨訪

張超二

漢張超留侯之後有文才靈帝時從車騎將軍朱儁征黃巾為別部司馬著賦頌碑文凡十九篇又善草書妙絕當時世共傳之

宋張超定海人自幼仁孝年十九父疾革懇禱無效乃刲脇取肝煮粥以進不踰日父愈嘉泰中復其家封植其墓

劉操二

東漢劉操陳留人隱士姜肱弟子肱卒操追慕其德共刊石頌之

前趙劉操僞主劉聰之子封魏王

王與二

東漢王與河內人明五經負笈追業常賃灌園恥交勢利歷官考城令漢陽太守見范冉傳

南宋王與永明中以左僕射出為雍州刺史誣殺寧蠻長史劉興祖伏誅



陳規三

漢陳規成固人其女弟順謙適鄧令曹寧十九寡居長育遺孤八十餘卒規著書歎述之

宋陳規安丘人為安陸令以勤王兵赴汴除直龍圖閣知德安府每出奇兵克期制勝改知順昌復剽金兵十餘萬於京城自紹興以來文臣鎮撫有威聲者惟規一人

金陳規稷山人明昌進士為右司諫數上章言事切直

有條貫南渡後諫官稱許古陳規而規不以訐直自  
名尤見重於世云

徐肇二

漢章帝時平原徐肇以三月初生三女至三日俱亡一  
村以為怪乃相與至水濱盥洗因流以濫觴見齊諧  
記

宋太宗時吉州徐肇善推卜為轉運使王延範推九宮  
算法得八少一肇驚起曰君侯大貴當如江南李國

主遂與延範同謀不軌伏誅見延範傳

李純四

漢李純中水侯李忠之孫永平初嗣爵坐母殺純叔父  
國除永初七年鄧太后復封琴亭侯

隋李純平棘人開皇中為介州長史見李璨傳

前秦李純仕苻堅晉昌太守以郡迎降呂光見後涼錄  
唐憲宗諱純

楊喬二

東漢楊喬烏傷人為尚書容儀偉麗數言政事桓帝愛其才貌詔妻以公主喬固辭不聽遂閉口不食七日而死見楊璇傳

晉弘農楊準有二子曰喬曰髦皆知名於世準使詣裴顧顧性弘方愛喬有高韻謂準曰喬當及卿髦少減也見樂廣傳

劉繇二

漢劉繇牟平人舉孝廉為下邑長棄官去平原陶丘洪

薦舉茂才後至揚州牧振武將軍

晉惠帝以衛瓘錄尚書事輔政為楚王瑋所譖被誅太保主簿劉繇冒難收瓘葬之復執黃幡搥登聞鼓鳴冤得追封蘭陵謚曰成

張脩三

漢靈帝時兩張脩一光和二年中郎將張脩使匈奴擅斬單于呼徵更立羌渠為單于徵下獄死

一中平元年妖巫張脩反寇亂郡縣

魏陳留王咸熙二年以虎賁張脩昔於成都馳馬至諸  
營言鍾會反逆以至沒身賜脩弟倚爵關內侯

許晏張彌各二

後漢許武陽義人以二弟晏普未顯欲令成名乃剖財  
產為三自取肥田廣宅二弟所得悉劣鄉人皆稱弟  
克讓而鄙武貪婪晏等並得選舉

吳嘉禾元年魏遼東太守公孫淵稱藩於孫權權大悅  
遣太常張彌執金吾許晏等將兵萬人持金寶珍貨

九錫備物乘海授淵封為燕王

後趙石虎建武二年使牙門將軍張彌率衆一萬徙洛陽鐘虞九龍翁仲銅駝飛廉于鄴

李肅三

漢李肅延熹五年為南郡太守武陵蠻夷寇掠江陵肅奔荆南而沒見馮緄傳

吳李肅南陽人才識明達孫權擢任選舉號為得才出補桂陽太守吏民悅服見步騭傳

左道事侍中穆紹常裸身被髮畫腹銜刀於隱屏處  
為紹求福故紹愛之薦歷黃門郎夏州刺史

金彥二

漢金彥雄縣書生嘗客遠方被病適新都王忱見彥疾  
困憊而視之彥因囑後事以金十斤相贈忱即營殯  
葬餘金悉置棺下後數年始識其父而告之迎喪取  
金忱由是顯名



宋金彥邵陽人力學善屬文喜敦孝友振困窶時號義門金氏牧守舉孝廉天下第一

劉宏二

後漢靈帝名宏

南宋劉宏文帝第七子元嘉末封建平王自少閒素篤好文籍帝寵愛殊常為立第於雞籠山盡山水之美建平國職高他國一階

鄭興二

後漢鄭興開封人以涼州刺史免歸建武初御史杜林  
薦興執義堅固敦悅詩書有公孫僑觀射父之德宜  
侍帷幄典機密乃徵為太中大夫

唐鄭興孝義人貞觀初以孝義稱因名其縣

任愷二

後漢任愷河內太守任延少子官至太常卿

晉任愷博昌人泰始初為侍中封昌國縣侯愷有經國  
之幹賈充惡其與上親接因稱愷才能宜在官人之

職帝即日以愷為吏部尚書然侍覲轉希

馬光二

後漢馬光伏波將軍第三子永平中為黃門侍郎肅宗  
即位自越騎校尉遷執金吾封許陽侯

隋馬光武安人少學從師數十年晝夜不息圖書識緯  
莫不畢覽尤明三禮為儒者所宗開皇初徵山東義  
學之士授太學博士

李成三

後漢軍吏李成苦歎晝夜不寐華佗以為腸癰與散兩錢服之即愈

宋李成青人五代末以詩酒遊公卿間善摹寫山水酒酣落筆烟景萬狀世傳以為寶見李宥傳

金李成歸信人勇力絕倫能挽弓三百斤歷安武軍節度使河南尹封濟國公在諸將中最勇鷙號令甚嚴所至克捷

鮑昱二

漢鮑昱鮑永之子中元初拜司隸校尉詔詣尚書使封  
胡降檄昱曰臣聞故事通官文書不著姓今司隸下  
書而著姓何也帝曰吾固欲令天下知忠臣之子復  
為司隸爾

宋鮑昱浮梁人家貧苦節未嘗以色下人登政和第為  
江南安撫置制使時軍務叢脞昱戢姦貪謹出入日  
用以饒

史弼二

漢史弼考城人由尚書出為平原相詔舉鉤黨郡國所奏多至數百弼獨無所上全活千餘人

元史弼博野人膂力絕人里門石獅重四百斤弼舉置數步外世祖召授管軍總管攻取宋襄樊及降下瓜哇葛郎等國累官平章政事封鄂國公

戴良三

漢戴良慎陽人才識超達議論高奇或問良自視天下孰可為比良曰我若仲尼長東魯大禹出西羌獨步

天下誰與為偶舉孝廉再辟司空府俱不就將妻子逃  
入江夏山中

吳黃武五年孫權以交趾懸遠乃分交趾以南為交州  
用戴良為刺史

元戴良金華人英偉秀發以文章擅名為淮南江北儒  
學提舉著春秋經傳考九靈山房文集

韓校二

後漢韓校為尚書令與郅壽陳寵俱以才能稱肅宗嘗

賜諸尚書劍惟此三人特以寶劍自署其名曰韓校  
楚龍淵邳壽蜀漢文陳寵濟南椎成

宋韓校為下邳令有遺愛民立祠祀之曰淵德公廟見  
淮安府志

陶範趙直各二

後漢安帝崩司徒李郃陰與少府陶範步兵校尉趙直  
謀立順帝會孫程等事先成故範等功不顯

蜀蔣琬為廣都長不治免官夢一牛頭在門流血滂沱



意甚惡之呼問占夢趙直直曰見血者事分明牛角及鼻公字之象君位必至公大吉之徵也後果如其言

晉陶範陶侃之子最知名太元初為光祿勳

王儁二

漢王儁汝南人避地武陵歸者百餘家公車徵不到帝都許復徵為尚書又不就見逸士傳

梁王儁太常王績長子不慧位止建安太守

朱冲二

東漢朱冲朱祐曾孫初祐封鬲侯傳國至孫演坐巫蠱事免鄧太后紹封冲為鬲侯

晉朱冲少有至行閒靜寡欲好學而貧常以耕藝為事邑里化其禮讓路不拾遺村無凶人詔補博士尋除太子右庶子每聞徵書輒逃入深山時人以為梁管之流

李建三

後漢中黃門李建與孫程等共迎立順帝封復陽侯  
唐兩李建 一宗室越王係之子建中元年封武威郡  
王授殿中監 一尚書李遜之弟家素清貧與兄躬  
耕致養嗜學力文舉進士授祕書郎德宗聞其名用  
為右拾遺卒於禮部侍郎

曹成陳光各二

漢扶風曹世叔妻班昭博學高才有節行和帝數召入  
宮令皇后諸貴人師事之號曰大家及鄧太后臨朝

與聞政事以出入之勤特封子成關內侯

漢安帝廢太子為濟陰王侍中陳光中散大夫曹成等  
十餘人詣鴻都門證太子無過

晉左衛將軍陳光上疏請伐胡太尉軍司蔡謨上疏言  
殿中之軍宜令所向有征無戰而頓之堅城之下勝  
之不武不勝為笑其議遂寢

劉全三

漢章帝子名全建初四年封平春王

宋端平三年元兵攻襄陽制置使孟珙命劉全率衆擣襄郢戰於樊城及郎神山皆大捷遂復襄陽見孟珙傳

金劉全太康人嘗為羣盜亡入衛真界謀作亂詭稱愛王以惑衆事覺伏誅

趙昱二

後漢趙昱琅邪人事母至孝高潔廉正州郡請召常稱病不應舉茂才再遷廣陵太守為笮融所害見謝承

漢書

隋趙昱為嘉州刺史有老蛟為害昱率千人臨江鼓譟  
自持刀入水頃之江水盡赤昱執蛟奮波而出唐太  
宗封神勇大將軍廟祀灌江口

韋義二

後漢韋義韋玄成玄孫辟舉理劇為廣都長甘陵陳二  
縣令政甚有績廣都為生立廟及卒三縣吏民舉哀  
若喪考妣

北魏韋義韋祐之父官上洛郡守大統中以祐著勲追  
贈秦州刺史

徐脩二

漢徐脩南州高士徐穉之子篤行孝悌隱居不仕太守  
華歆禮請相見固病不詣漢末寇賊縱橫皆敬脩德  
行轉相約敕不犯其閭

晉羊祜都督荊州頗好畋漁嘗欲夜出軍司徐脩執祭  
當營門曰將軍之安危即國家之安危脩今若死此

門乃開祐改容謝之後遂稀出

陳翔二

漢陳翔邵陵人拜侍御史正旦朝賀大將軍梁冀威儀不整翔奏冀恃貴不敬請收案罪時人奇之

蜀陳翔宋大學士陳堯佐之祖事王建為新井令因家閬中

高彪二

漢高彪無錫人試經第一除郎中校書東觀數奏賦頌



奇文因事諷諫靈帝異之遷內黃令有德政詔東觀  
畫彪像以勸學者

金高彪渤海人勇健絕人能日行三百里身被重鎧歷  
險如飛大小數十戰無不剋捷官至兵部尚書封舒  
國公

李敏三

漢李敏襄平人為河內太守去官還鄉里遼東太守公  
孫度欲彊用之敏乘輕舟浮海莫知所終

隋李敏李賢之孫襲爵廣宗公配樂平公主女娥英及  
文帝受禪公主謂敏曰我以天下與至尊惟一女夫  
當為汝求柱國若授餘官慎毋謝及進見遂於坐發  
詔授柱國

唐李敏玄宗第十子懷哀王

張彪二

漢桓帝誅梁冀使司隸校尉張彪將虎賁羽林劍戟士  
千餘人圍冀第

梁張彪初居若邪山為盜頗有部曲後歸臨城公蕭大連為中兵參軍舉義征侯景元帝甚嘉之引為爪牙除東揚州刺史給鼓吹

羊亮二

東漢楊秉為太尉條奏貪穢牧守青州刺史羊亮等五十餘人或死或免天下莫不肅然

晉羊亮羊祐從兄之子有才能多計數與之交者必偽盡欺誠而殊非其實惠帝時為大鴻臚與關東連謀

卷七  
內不自安奔於并州為劉元海所害

趙溫二

後漢趙溫趙典兄子為京兆郡丞歎曰大丈夫當雄飛  
安能雌伏遂棄去獻帝西遷為侍中同輿至長安封  
江南亭侯代楊彪為司徒錄尚書事

北魏趙溫天水人博學有高名仕姚泓為天水太守泓  
敗魏太武以為仇池令

柳毅二

漢初平元年遼東太守公孫度知中國擾攘欲圖霸王之業與親吏柳毅等謀遂自立為遼東侯平州牧唐柳毅儀鳳中應舉下第還至涇陽遇洞庭龍女與同見洞庭君洞庭君以女配毅獲珍寶無算徙居南海不知所終見虞初志

王長文二

後漢王長文與郭林宗同鄉嘗被獎拔遂以成名見謝承書

晉王長文鄴人少以才學知名放蕩不羈州府辟命皆不就閉門自守不交人事著書四卷名曰通玄經有文言卦象可用卜筮時人比之揚雄太玄

楊定二

漢末楊定為安西將軍故董卓部曲將懼李傕忍害乃與郭汜合謀迎天子幸其營見董卓傳

前秦楊定初仕苻堅為驃騎大將軍雍州牧招合夷夏得數千家進平天水略陽遂有秦州之地自稱秦州

刺史隴西王見前秦錄

周昂二

漢周昂獻帝時任九江太守為袁術所攻其弟豫州刺史  
史暘收兵往助之軍敗還鄉里為許貢所害見會稽  
典錄

金周昂學術醇正諸儒皆師尊之擢第歷職臺省出佐  
三司從承裕軍城陷遇害

夏承二

漢夏承建寧初為淳于長卒官蔡中郎為作碑銘余嘗  
得搨本其書八分甚奇古其文猶完善可誦及查中  
郎集無此文迺知古人傑作湮沒者多矣因具錄于  
左

君諱承字仲充東萊府君之孫太尉掾之中子右中  
郎將弟也累葉牧守印綬典據十有餘人皆德任其  
位名豐其爵是故寵祿傳于歷世策勲著于王室君  
鍾其美受性淵懿含和履仁治詩尚書兼覽羣藝靡



不尋陽州郡更請屈已匡君為主簿督郵五官掾功  
曹上計掾守令冀州從事所在執憲彈繩糾枉忠絜  
清肅進退以禮公道篤愛先人後已克讓有終察孝  
不行太傅胡公歆其德美旌招俯就羔羊在公四府  
歸高除淳于長到官正席流恩哀藹糾姦示惡旬月  
化行風俗改易輻軒六轡飛躍臨津不日則月皓天  
不弔殲此良人年五十有六建寧三年六月癸巳淹  
疾卒官嗚呼痛哉臣隸辟踊悲動左右百姓號咷若

喪考妣咳孤憤泣怛怛傷摧勒銘金石惟以告哀其  
辭曰於穆皇祖天挺應期佐時理物紹蹤先軌積德  
勤約燕于孫子君之羣感並時繁祉明明君德令聞  
不已高山景行慕前賢列庶同如蘭意願未止中遭  
冤天不終其紀夙世實祚早喪懿寶抱器幽潛永歸  
蒿里痛矣如之行路感動黨魂有靈垂後不朽

宋夏承鄴人任開封少尹靖康間虜騎入寇京尹徐秉  
哲散榜根括皇族承折以大義毀榜盡散拘繫之人

隆興初以承忠義詔特贈朝議大夫見寧波府志

孫瑾三

漢末公孫瓚執幽州牧劉虞欲殺之故常山相孫瑾忠義憤發相與就虞罵瓚極口然後同死見公孫瓚傳  
晉孫瑾故吳主孫皓太子皓歸降至京師賜號歸命侯  
瑾拜中郎見吳志

元孫瑾父喪哀毀嚴冬跣足而步停柩四載衣不解帶  
常食粥誦佛書事繼母尤孝嘗患癰瑾親吮之又喪

目瑾舐之復明

陳寶二

吳孫策率衆渡江攻走劉繇遣將陳寶詣阜陵迎母及弟因發恩布令告諭郡縣

宋高宗紹興二年壽春鈐轄陳寶舉兵復順昌府

張裕二

蜀漢張裕南郡人精於占候先主爭漢中謂軍必不利先主不用其言果得地而不得民且將軍吳蘭等皆

沒不還及魏氏之立先主之薨皆如裕所策

南宋張裕吳郡人為太尉主簿揚州中從事武帝西伐  
劉毅北征關洛皆居留守任州事出為都督廣州刺  
史平越中郎將綏靜百越嶺外安之

### 韓脩二

袁術遣使韓脩以僭號議告呂布并求迎婦布怨術初  
不已受遂與絕婚械送脩梟首許市見張邈傳

前秦苻建元十六年八月以大鴻臚韓脩領護赤河中

郎將移烏丸府於代郡之平城見前秦錄

李衡四

吳李衡武陵人建興間為丹陽太守每欲治產業其妻  
習氏輒不聽後密遣人往武陵作宅種柑橘千株臨  
死敕其子曰汝母惡吾營家故貧如是然吾州里有  
千頭木奴可足汝衣食爾

南漢李衡李德裕之孫奉使至南海劉隱辟置幕府待  
以賓客後隱子龔僭位以衡為禮部侍郎平章政事

宋兩李衡 一江都人進士四遷為侍御史外戚張說  
以節度使掌兵柄衡廷諍移時改起居郎上章請老  
一吉水人與兄籌同乳二歲喪母十歲喪父兄弟  
每以不逮事親為恨負土成墳廬於墓左廬所產木  
一本兩幹高丈許復合於一至其末仍分兩幹五枝  
鄉人以為瑞應

## 陳容二

後漢陳容射陽人隨臧洪為東都丞袁紹攻洪城陷被

執容曰將軍舉大事而先殺忠義可乎紹慙見殺

宋陳容福堂人端平進士詩文豪壯善畫龍得變化之意潑墨成雲嘑水成霧醉餘大叫脫巾濡墨信手塗抹或全體或一臂一首隱約不可名狀曾不經意而種種神奇

董和二

蜀董和枝江人事劉璋為益州太守先主定蜀徵為掌軍中郎將與諸葛亮並署左將軍大司馬府事外牧



殊域內幹機衡凡二十餘年死之日家無儋石之儲  
吳孫權征皖城克之獲廬江太守朱光及參軍董和男  
女數萬口



欽定四庫全書

同姓名錄  
卷七

五

同姓名錄卷七

欽定四庫全書

子部  
同姓名錄卷八

詳校官中書臣孫球

主事臣祁韻士覆勘

覆校官中書臣汪學金

校對官原任典簿臣郭祚熾

謄錄監生臣金國禮

欽定四庫全書

同姓名錄卷八

明 余寅 撰

陸績二

吳陸績吳人年六歲於九江見袁術術出橘績懷三枚拜辭墮地術曰陸郎作賓客而懷橘乎績跪荅曰欲歸遺母術大奇之後事孫權至鬱林太守偏將軍

前秦陸績西平人身長八尺腰帶十圍清辨善談論雄武便弓馬仕符堅為荊州刺史見前秦錄

桓彝二

吳桓彝事孫亮為尚書時大將軍孫綝專恣勒兵廢亮以亮罪狀班告遠近彝不肯署名綝怒殺之

晉桓彝桓榮九世孫為尚書吏部郎王敦擅權以疾去職明帝將伐敦拜彝散騎常侍引參密謀敦平封萬寧縣男

張奕三

吳孫皓疾大司農樓玄徙之交趾遣將軍張奕追賜玄

鳩奕以玄賢者不忍輒宣詔玄陰知之即服藥死  
晉張奕南充人以長水校尉領荊州刺史惠帝令劉弘  
都督荊州奕不受代弘討斬之

金張奕高平人以蔭補官大定初由河東北路轉運使  
徵拜戶部尚書遇事詳敏得其要歸

## 田疇二

魏田疇無終人幽州牧劉虞署為從事虞為公孫瓚所  
害疇率宗族入徐無山中躬耕養親百姓歸者五千

餘家曹操北征烏丸署為司空戶曹掾令將其眾為  
向導遂大斬獲論功行封固辭不受

宋田疇華亭人嘉定間設講席於國學六館之士皆北  
面著學易蹊徑四書說約

韓建二

吳韓建嘉興人晉徵士韓績之父官至大鴻臚

梁韓建少為蔡州軍校以麾下兵迎僖宗於蜀拜金吾  
衛將軍及還長安授潼關防禦使華州刺史昭宗辛

華州因謀廢立會梁太祖迎帝乃止後降於梁為亂  
軍所殺

董昭二

魏董昭定陶人勸曹操遷都於許挾天子以令諸侯卒  
成霸業官司徒封成都鄉侯

晉豫州刺史祖逖進據太丘流人塢主樊雅遣衆夜襲  
逖趣逃幕軍士大亂逖命督護董昭與賊戰走之

高定三



蜀漢先主薨高定恣睢於越嶲交州刺史李恢擊破之  
唐高定高郢之子聰警絕倫七歲讀尚書至湯誓問曰  
奈何以臣伐君郢曰應天順人不為非道又曰用命  
賞于祖不用命戮于社是順人乎郢不能對

元高定渾源人好學尚氣節仕至永安軍節度使謂諸  
子曰吾蒙國恩致位侯伯布衣之極曷敢久貪爵寵  
遂謝政去

張燕二

魏張燕真定人初為羣盜常山上黨諸小帥各以部從  
衆至百萬太祖將定冀州燕率衆佐王師詣鄴拜平  
北將軍封安國侯

晉張燕官巴西太守時鄧定等入漢中為盜燕承命討  
之定窘急餽金求緩師遂進逼漢中刺史張光以其  
緩寇致敗斬燕以徇

#### 李虎四

魏李虎漢中人武帝刻漢中虎將五百家歸降拜為將

軍遷於略陽

蜀後主降於鄧艾遣尚書郎李虎送士民簿領戶二十八萬男女口九十四萬

北魏李虎為後衛左僕射封隴西郡公與太保李弼大司馬獨孤信等功參佐命當時稱為八柱國

宋李虎為湖南守將理宗景定元年詔進虎官三轉帶行閣門宣贊賜銀絹旌其守禦之功

曹矩二

魏曹矩太祖之子封范陽王宋曹矩休寧人景祐進士  
以純孝聞官至屯田郎中其任都官日贈父為殿中  
丞療黃之夕芝產塋上郡上其事詔以所居為孝芝  
里

孫瑜二

吳孫瑜孫權從弟以奮威將軍領丹陽太守降附萬餘  
招納廬江二郡時諸將惟事軍務而瑜好樂墳典雖  
在戎旅誦不絕聲

宋孫瑜博平人仁宗時知蔡州毀吳元濟像以其祠祀  
裴度後至工部侍郎

王雄二

魏王雄晉司徒王戎之祖青龍中為幽州刺史

北周王雄襲父爵庸國公授柱國大將軍益州總管隋  
文帝輔政將圖匡復左右軍叛被害

陳祇二

蜀漢陳祇汝南人多技藝挾數術費禕甚異之累官侍

中尚書令與中常侍黃皓互相表裏操弄威柄終至覆國

陳陳祗後主第六子至德元年立為信義王位琅邪彭城二郡太守

### 張閣二

魏張閣東郡人為永寧太僕以簡質聞杜恕著家戒稱閣曰張子臺視之如鄙樸人其心中不知天地間何者為美何者為惡敦然與陰陽合德作人如此自可

不富貴即禍患當何從來

宋張閣崇寧中翰林學士嘗夜盛寒帝命草制及藁進帝猶坐賞其警敏賜詩以寵之

郭汜二

漢末郭汜為董卓別將卓既被誅汜聚眾向長安殺王允自稱後將軍美陽侯專擅朝政後為其將五習所殺

前趙郭汜貌極醜陋樸訥無慧感憤遊學師事孔曜曜

見而喜之曰此生有公骨期當貴達仕劉淵歷聰曜  
之世位侍中司徒

魯肅二

吳魯肅東城人為贊軍校尉赤壁之役首畫拒操之策  
官至漢昌太守偏將軍

陳後主禎明三年隋師將濟江南康太守魯肅將兵以  
鐵鎖橫江隋將楊素奮兵擊之死者五千餘人見六  
朝事迹



陸叡二

孫吳陸叡陸績之子官長水校尉

後漢陸叡陸麗之子襲爵東平王

高壽二

吳黃武四年魏文帝至廣陵臨江觀兵見波濤洶湧而還孫韶遣將軍高壽率敢死士五百於徑路夜要之文帝大驚壽等獲副車羽蓋以獻

元高壽姚安路總管高明之子雲南中書省左丞

徐陵二

吳徐陵太末人歷三縣長零陵太守時朝廷俟以列卿之位故虞翻書曰元太受上卿之遇叔向在晉未若於今其見重如此見虞翻傳

陳徐陵徐摛之子年數歲候沙門寶誌寶誌摩其頂曰天上石麒麟也太建中尚書左僕射太子少傅封建昌縣侯

張柬張諤各二

卷八  
吳張秉陽羨人生於庶民豫章太守顧邵拔而友之為  
立聲譽官至雲陽太守見顧邵傳

宋張秉新安人父諤以三司度支判官出為荊湖江浙  
制置茶鹽副使秉景德間累禮部侍郎加樞密直學  
士出知并州將行懇求御詩為餞上為作五言賜之  
蜀翰林學士范禹偁少隨母改適因冒姓張名諤迨登  
第後始復姓上郡守啟曰昔年上第誤標張祿之名  
今日故園復作范睢之裔見蜀檇杌

孫泰二

吳孫泰孫權從子曹操之甥也為長水校尉從權圍新城  
中流矢死

晉孫泰孫恩叔父傳得祕術誑百姓武帝召為輔國  
將軍新安太守扇動百姓私集徒眾會稽王道子恐  
其為亂誅之眾聞泰死猶謂蟬蛻登仙

嚴綱二

吳嚴綱赤烏二年為臨賀太守都督廖式反被殺

宋嚴綱義熙十二年為寧遠將軍從王仲德北伐

馮熙二

吳馮熙潁川人為中大夫使魏應對不屈文帝不悅送至摩陂欲困苦之熙引刀自刺權聞之流涕曰此與蘇武何異竟死於魏

後魏馮熙信都人尚景穆女博陵長公主拜駙馬都尉太師中書監封京兆郡公孝文帝納熙三女二為后一為左昭儀

李輔二

魏新城太守孟達反司馬懿潛軍進討八道攻之達將  
李輔開門出降斬達首傳京師

蜀李輔益州牧李特之兄特承制拜為驃騎將軍官桑  
之敗被晉益州刺史羅尚所殺

韓浩三

魏夏侯惇守濮陽呂布遣將偽降共執惇責以寶貨軍  
中震恐惇將韓浩勒兵屯營門令諸將按甲不得動

遂詣惇所叱持質者召兵擊斬之

唐韓浩韓休之子為萬年主簿坐籍御史大夫王鉷家財有所容隱為鮮于仲通所發配流循州

宋韓浩韓琦之孫以奉直大夫守濰州建炎初金人攻城浩率衆固守城陷戰死

吳範二

吳吳範上虞人以治歷數知風氣聞孫權東征西討動輒咨問終皆如言任為騎都尉領太史令權數訪其

衍範祕惜不以至要語權由是恨之

宋吳範大觀政和間詔舉八行閭里以範應獨守其志  
辭不就子仲基仲達皆第進士

朱紀二

吳朱紀毗陵侯朱治之子以校尉領兵孫權以策女妻  
之前趙劉聰襲偽位以右僕射朱紀女為貴妃

鄧芝二

蜀漢鄧芝新野人事後主為車騎將軍封陽武亭侯嘗



使吳結好孫權喜其誠歟與孔明書曰丁公挾張陰  
化不盡和合二國惟有鄧芝

後蜀李雄王衡三年扶風鄧芝率流民前後數千家來  
歸

楊洪楊發各二

蜀漢楊洪武陽人建興初為蜀郡太守忠節將軍賜爵  
關內侯少不好學而忠清欵亮憂公如家

偽蜀李雄僭稱成都王以楊發為侍中楊洪為益州刺

史

唐楊發馮翊人宣宗以發長於邊事授廣州刺史嶺南  
節度使以嚴為理軍亂見囚坐貶婺州刺史

陳恂二

吳孫權嘉禾二年句驪王高宮奉表稱臣權喜遷中書  
陳恂拜宮為單于加賜衣服珍寶

晉永康元年以成都內史耿滕代趙廞為益州刺史廞  
據成都以叛滕欲入州功曹陳恂苦諫不從遂率眾

入城歛遣兵逆擊滕敗死郡吏皆竄走惟恂面縛請  
滕喪歛義而許之見蜀錄李特傳

張緝二

魏張緝西鄉侯張既之子嗣爵為中書郎稍遷東莞太  
守嘉平中女為皇后徵拜光祿大夫位特進

元張緝膠州人性孝友能詩文領鄉薦為泰州幕棄職  
養親至正末兵亂母姬方卧病賊突入舉槍刺姬緝  
以身蔽中脇三日死

曹琮二

魏公竊據神器而乃孫琮亦復盜作尚方是謂繩其祖武

魯公宣力天家而其子琮亦能驅除劇寇足稱綽有父風

魏曹琮太祖之孫黃初三年封己氏公坐於中尚方作禁物削戶三百貶爵都鄉侯

宋曹琮魯國公彬之子仁宋時為榮州刺史會元昊

寇山外琮發騎士擊之終於陝西經略安撫招討副使

王凱二

魏王凱與族弟粲俱避地荊州劉表欲以女妻粲嫌其形陋而用率以凱有風貌遂妻之凱生業業生弼並顯名當世

宋王凱王全斌曾孫為麟州都監夏人入寇賊衆三萬凱以兵六千陷陣流矢中面鬪猶不解斬首三百餘

級賊自蹂踐死者千餘人

石虎二

魏李勝為河南尹廳事前屠蘇壞令人更治之小材激  
墮正搗受符吏石虎頭斷之不逾旬日遷荊州刺史  
以黨曹爽伏誅

後趙石虎偽主石勒從子勇冠當時初封中山王勒死  
廢其子弘而自立

孟康二

魏孟康廣宗人明帝時散騎常侍中書令封廣陵亭侯  
嘗注前漢書

晉孟康武帝時為太子洗馬以王濬伐吳功重報輕上  
表訟之帝乃遷濬鎮軍大將軍

楊偉二

魏楊偉馮翊人明帝治宮室偉諫曰今作宮室斬伐生  
民墓上松柏毀壞碑獸石柱辜及亡人傷孝子心不  
可以為後世法則

宋楊偉天禧進士翰林學士中書舍人其通判單州時  
巡檢卒二百餘人謀殺巡檢使持兵入鼓角門州將  
不敢出偉挺身往諭悉令投兵籍首惡十餘人斬之  
人服其略

王基四

魏王基曲城人明帝時為征南將軍都督荊州諸軍事  
封東武侯史稱其學行堅白垂聲著績可謂國之良  
臣



晉王基王覽次子治書侍御史

西秦乞伏熾磐永康三年以曜武將軍王基為晉興太守鎮浩豐

北齊王基狄那人頗讀書有智略歷南益北豫二州刺史所在好聚斂然性和直吏民不甚怨苦見王紘傳

裴潛二

魏裴潛聞喜人明帝時大司農封清陽亭侯遷尚書令奏正分職料簡名實出事使斷官府者百五十餘條

吳孫權嘉禾元年遣將軍周賀校尉裴潛乘海之遼東  
魏將田豫要擊斬賀等於成山

### 高翼二

魏高翼勃海人孝昌末葛榮作亂朝廷以翼山東豪右  
即家拜勃海太守翼率合境徙居河濟間朝廷因置  
東冀州以翼為刺史封樂城縣侯

唐德宗時李希烈陷汴州許州刺史劉玄佐遣將軍高  
翼以精兵五千救援襄邑城陷赴水死

曹鑒三

魏曹鑒文帝第四子黃初六年封東武陽王

唐曹鑒郴州富人刑部尚書裴敦復討海賊以鑒為郎將見裴寬傳

元曹鑒宛平人官至禮部尚書中外賜歷三十餘年以清介稱

楊俊三

魏楊俊獲嘉人丞相掾屬遷南陽太守宣德教立學校

吏民稱之卒於征南軍師中尉

晉楊俊楊脩曾孫為太傅掾最清峭

隋楊俊文帝第三子封秦王拜上柱國鎮廣陵初頗有  
令聞後漸奢侈為妃作七寶暴離重不可戴以馬負  
之而行帝惡其奢縱免官就第

### 劉劭二

魏劉劭邯鄲人文帝時尚書散騎侍郎受詔集五經羣  
書以類相從作皇覽拜騎都尉正始中執經講學賜

爵關內侯

宋元凶劭文帝長子帝諒闇中生故祕之至元嘉三年方云劭生自前代人君即位後皇后生太子唯殷帝乙踐祚正妃生紂至此又有劭焉後果弑逆為孝武所誅

張恂三

吳張恂中軍督張布之弟孫休論布誅孫綝功以恂為校尉見孫休傳

後魏張恂張袞之弟參代王軍事說道武取中土士庶之望以建大業帝深加器異皇始初拜中書侍郎參帷幄密謀賜爵平臯子

南燕張恂東武城人仕慕容氏散騎常侍

### 韓綜二

一吳石城侯韓當之子襲爵領兵使守武昌淫亂不軌將家屬部曲數千人奔魏

一宋太保韓億之子舉進士為刑部員外郎嘗充契丹

館伴使使者欲稱北朝而去契丹號綜曰自古未有  
建國而無號者使慙遂不復言其後復擇館伴帝曰  
孰踰韓綜者

趙儼二

魏趙儼陽翟人為丞相主簿謀策多合曹操意拜駙馬  
都尉至驃騎將軍司空封都鄉侯

北周趙儼為王謙部將謙作亂命儼屯開遠衆十萬連  
營三十里行軍總管張威鑿山通道攻其背儼敗走

孫康二

魏孫康與臧霸聚衆屯開陽太祖募索得霸見而悅之  
使霸招康命為城陽太守以功封列侯見臧霸傳  
晉孫康家貧無油嘗夜映雪讀書後為御史大夫

王贊二

魏王贊玄菟郡太守見孫權傳

宋王贊建隆初為三司副使時始平李重進太祖素知  
贊材幹即令知揚州既行舟覆溺死上甚嗟悼謂左



右曰溺吾樞密使矣厚賻其家

李休二

魏李休南鄭人初為張魯司馬太祖以其嘗勸魯內附  
賜爵關內侯歷上黨鉅鹿二郡太守見李勝傳

後魏李休李順之後官散騎常侍

曹珣二

魏曹珣武帝子封西鄉侯

宋曹珣曹彬子官左藏庫副使

張舉二

吳張舉為句章令民有妻殺夫因放火燒舍詐稱夫死  
於火者舉以口無灰詰之妻果報罪

後趙石虎遣征北將軍張舉自雁門討索頭郁鞠剋之  
程曉二

魏程曉衛尉程昱之孫嘉平中為黃門侍郎遷汝南太  
守有通識大著文章

晉程曉北地人官遊長安大鴻臚辛攀時年七歲隨父

在京師曉目攀而笑曰犁牛騂犢孺子之謂攀曰戲  
及人親非雅訓也曉及賓客大奇之見前涼錄

王昶二

魏王昶太原人明帝時為征南將軍都督荊豫諸軍事  
以破吳功進大將軍封京陵侯

五代王昶閩王王璘長子晉天福初仍冊封為閩王好  
巫起三清臺三層以黃金數千斤鑄元始天尊太上  
老君像日焚龍腦薰陸諸香數斤作樂於臺下晝夜

聲不輟云如此可求大還丹後為叔延義所殺

石韜二

魏石韜與同郡徐庶相友愛黃初中歷郡守典農校尉  
見孔明傳

後趙石韜偽主石虎第三子封秦公為太尉與太子宣  
送日省可尚書奏事專決刑賞宣惡而殺之

孫盛二

魏文帝遣曹真等攻吳江陵孫權遣將軍孫盛督萬人

卷八  
備州上真等進攻盛不能拒即時却退

晉孫盛中都人祕書監加給事中以從桓溫平蜀封吳  
昌縣侯篤學不倦手不釋卷著魏氏春秋晉陽秋詞  
直而理正咸稱良史

### 韓洪三

魏韓洪司徒韓暨之孫侍御史

隋韓洪韓擒虎之弟文帝以洪驍勇拜代州總管仁壽  
初突厥犯塞洪將兵出拒虜悉衆圍之矢下如雨洪

四面搏戰殺傷甚衆潰圍而出

唐韓洪韓休之子天寶初任司庫員外郎安祿山反西京失守洪陷於賊逃奔山谷將投行在為賊所擒見害

李恢二

蜀漢李恢俞元人章武初為庾降都督領交州刺史先主薨越巂諸郡反恢擊破之封漢興亭侯加安漢將軍

元魏李恢李靈之子襲高邑子爵拜長安鎮副將進為  
侯東平王道符謀反遇害

王觀二

魏王觀廩丘人明帝時為侍御史典行臺獄時多倉卒  
喜怒而觀不阿意順旨累擢右僕射司空封陽鄉侯  
遼王觀南京人博學有才辯咸雍中參知政事兼知南  
院樞密事坐矯詔修私第削爵

姚靜二

魏明帝太和元年蜀將姚靜率其屬七千餘人來降見  
晉宣帝紀

後涼呂光剋平西域還至玉門秦苻堅燉煌太守姚靜  
以郡迎降見後涼錄

蘇林二

魏蘇林陳留人博學多通黃初中為博士給事中以老  
歸第國家有大政每遣人就問之文帝典論所稱蘇  
林即此人



前燕蘇林中山人起兵於無極自稱天子慕容儁遣其弟太原王恪討林斬之

葛洪二

晉葛洪丹陽人少好學尤好神仙導引之法太安中討平石冰賜爵關內侯咸和初除散騎常侍領大著作皆固辭不就入羅浮山煉丹養作抱朴子一百十六篇一日兀然若睡而卒舉屍入棺輕如空衣世以為尸解云

宋葛洪東陽人淳熙進士參知政事封東陽郡公世稱其侃侃正直有大臣風

張禕四

晉三張禕 一司空張華之子好學謙敬有父風位散騎常侍趙王倫之亂與父同遇害 一孝武大元二年為郎中使於苻堅立在階下以手障額看堅堅問曰視天子不過叔卿何慢朕答曰臣在南中聞長安氏為天子頤上有角堅大笑見前秦錄 一吳郡人

少有操行恭帝時為郎中令劉裕以禕帝之故吏素所親信封藥酒密令行鴆禕歎曰鴆君而求生何面目視息世間哉因自飲死

按張司空之子死於惠帝時先孝武七十年而恭帝即位又後孝武四十餘年其人猶為郎中令足徵三人各自不同故得并收

唐張禕張正甫之孫刑兵禮三部尚書以行義者稱

王彬三

晉王彬王導從弟典軍將軍都亭侯從兄敦舉兵愍帝  
使彬勞之彬數敦罪惡辭極慷慨敦大怒時導在坐  
勸彬起謝彬曰有脚疾見天子尚欲不拜此復何謝  
敦曰脚痛孰與頸痛彬意氣自若敦平拜光祿勳右  
僕射

齊王彬王僧虔之子好文章習篆隸與兄志齊名時人  
語曰三真六草為天下寶尚高帝女臨海長公主拜  
駙馬都尉歷吏部尚書祕書監

宋王彬固始人淳化進士提點荆湖南路刑獄終於太常少卿

陳達二

漢陳達安帝時中常侍帝崩達等白太后更徵立諸國王子中黃門孫程等斬達迎濟陰王即皇帝位

晉陳達漢太丘長陳寔裔孫永嘉中為長城令悅其山水遂家焉嘗曰此地山川秀麗當有王者興二百年後我子孫必鍾斯運至十世孫霸先受梁禪果如其

言

司馬端二

晉司馬端宗室清河王遐之子初封廣川王及豫章王  
銓入為皇太子轉封豫章拜散騎常侍平南將軍都  
督江州諸軍洛陽陷沒於石勒

齊司馬端河內人梁始興內史司馬筠之父為始安王  
遙光掌記遙光敗為亂兵所殺

李雄七

後漢李雄大司空李通之子通乞骸骨以特進奉朝請  
光武感通首創大謀即日封雄為召陵侯

後蜀李雄李特第三子特據蜀拜雄前將軍特死雄自  
稱太將軍益州牧永興初遂僭大號

隋兩李雄 一李穆之子隋文帝以穆勲第一授雄儀  
同大將軍別封密國公

一渤海人少慷慨有壯志從隋文帝破尉遲迥賜爵  
建昌縣公進大將軍幽州總管戶部尚書

宋兩李雄 一北海人有文學好丹青尤精於神鬼嘗  
於龍興寺壁為三鬼其一執巨蟒呼喊有忿怒之勢  
觀者往往驚怖見名畫評

一瑞安小校元兵逼浙東圍瑞安廉訪使趙與擇誓  
以死守雄夜開門納外兵與擇巷戰敗死

金宣宗貞祐初年元兵攻居庸工部員外郎李英乘夜  
與壯士李雄等出城招募軍民得萬餘人詭稱土豪  
時時出戰



晉兩張茂

一元帝時為太子右衛率出補吳國內史沈克反遇害  
茂少時夢得大象以問占夢萬推推曰君當得大郡  
而不善也問其故推曰象者大獸獸者守也故知當  
得大郡然象以齒焚為人所害果如其言

一涼州牧張軌之子太興三年為平西將軍仍牧涼州  
時海內大亂皇輿播遷而茂不廢貢獻朝廷嘉之

王宏四

漢王宏祁人獻帝時為右扶風值李傕郭汜為亂欲舉兵除君側之惡左馮翊宋翼不從詎曰豎儒不足與議大計遂俱就徵下獄死

晉王宏高平人泰始初為汲郡太守視民如子治有殊績武帝下詔褒美賜穀千斛以司隸校尉終

後趙王宏祁人仕石季龍河東太守綿竹侯見南燕錄  
王牢傳

唐王宏濟南人與太宗幼日同學因問為八體書及帝

即極訪宏鄉人竟傳隱去是亦子陵之徒與見柳子厚龍城錄

石苞二

晉石苞渤海人為徐州刺史文帝敗於東關苞獨全軍而還帝指所持節謂苞曰恨不以此授卿以究大事後至大司馬封樂陵郡公

後趙石苞僞主石虎第六子虎僭即帝位封苞為樂平王鎮守長安

趙開二

晉隆安四年衆推李玄盛為涼公領秦涼二州牧玄盛以趙開為駢馬護軍

宋趙開安居人元符進士有通變之才建炎初提舉川陝茶馬事悉更其法時張浚治兵秦川經營兩河旬犒月賞支費不可計

李儼三

晉李儼隴西人誅大姓彭姚自立於隴右奉中興年號

百姓悅之涼州牧張天錫伐儼儼大敗入城固守

唐李儼餘干人德宗時為左司諫方士桑道茂奏言奉  
天有天子氣上欲屠其城儼極諫乞殺道茂上悟乃  
止

遼李儼析津人太康初參知政事封漆水郡王見李處  
溫傳

張庭堅二

晉張庭堅涼州張祚次子祚廢耀靈僭立封庭堅為建

康王

宋張廷堅廣安人元祐進士除太學博士擢右正言在職逾月數上封事為曾布李清臣所擠改知汝州又不附蔡京遂列黨籍編管虢州

王洽二

晉王洽王導第三子諸子中最知名歷官內史領軍中書令

唐王洽性嗜酒多放敖江湖間每欲作圖必沉醉解衣

盤礴先以墨潑幃上或叫或吟脚蹙手抹因其形似  
或為山石或為林泉自然天成不見墨汚之迹見名  
畫錄

丁元三

晉丁元譙人桓玄攻歷陽豫州刺史司馬尚之率步卒  
陣於浦上衆潰逃於涂中元等告玄玄收斬之

宋丁元濠州統領遇金人於雅里洲被圍元大諄其徒  
勉以毋得負國一舟二百人皆鬪死

元丁元至正初亞中大夫參議中書省事預修金史

司馬亮二

晉司馬亮宣帝第四子封汝南王大尉錄尚書事楚王瑋誣亮謀廢立矯詔殺之

宋司馬亮始興內史司馬筠之祖司空從事中郎

李驤三

晉李驤涪人為尚書郎與成都杜軫齊名每有論議廷臣莫逾時號蜀二郎見重慶人物志



蜀李驤偽主李雄季父為太傅都督中外諸軍總錄尚書事見蜀錄

漢李驤為太原少尹謂北京留守劉旻曰郭公舉兵犯順其勢不能為漢臣必不為劉氏立後因勸旻以兵下大行控孟津以俟變旻怒斬之後周太祖果代漢旻慟哭為驤立祠見東漢世家

張肅二

晉張肅涼州牧張寔叔父官建威將軍西海太守以京

師危迫天子蒙塵請為先鋒擊劉曜實以年老弗許  
聞京師陷悲憤而死

宋張肅舒城人以直諒稱由廣東轉運判官遷江東提  
點刑獄一時名流自司馬光而下七人有四人分韻  
作詩以贈其行

晉兩王渾

一司空王昶之子揚州都督進封京陵公足報平吳之  
烈

一司徒王戎之父涼州刺史賜爵貞陵侯用酬綏邊之勲

成公綏二

晉成公綏白馬人少有俊才張華每見其文歎伏以為絕倫後官中書郎每與華受詔並為詩賦

燕成公綏為慕容超太史令義熙三年超祀南郊大風暴起天地晝昏其行宮羽儀皆振裂超懼密問綏對以誅戮賢良賦役繁苦所致超懼而大赦

徐浩三

晉徐浩徐邈之子鎮南將軍何無忌請為功曹出補西陽太守為盧循所害

唐兩徐浩 一越州人少舉明經工草隸以文學為張說所重官至集賢殿學士

一安祿山陷洛陽平原太守顏真卿得兵二十餘萬移牒清河等郡遣大將李擇交裨將徐浩等進兵與清河合勢擊祿山

李昶四

前涼李昶安西亭侯李弇之子太子侍講見前涼錄  
北魏李昶李彪之孫幼解屬文十數歲為明堂賦才制  
可觀保定初以近侍清要盛選國華由御正中大夫  
為納言進爵臨黃縣公

唐李昶宗室恒山王承乾之孫扶風太守

元李昶進士第二人官至吏禮二部尚書品格條式選  
舉禮文多所詳定凡議大政宰相延置上座傾聽其

說

張褒二

晉趙王倫篡位齊王冏檄刺史郤隆欲保州不肯偏助  
主簿張褒入諫謂若無所助變難將生州亦不可保  
隆猶豫不決遂為其下所害

梁天監中翰林學士張褒不供職事御史彈劾之褒曰  
碧山不負吾乃焚章長嘯而去

王蔚二



晉王蔚猗氏人世脩儒史之學嘗著至機論詞義甚美  
官至夏陽侯相

金王蔚香河人皇統進士通敏廉介曉析吏事大定末  
吏部尚書參知政事

胡淵三

晉胡淵秦州刺史胡烈之子烈隨鍾會滅蜀會謀反欲  
殺烈等淵雷鼓出門諸軍爭先殺會時淵年十八殺  
會救父名震遠近見晉諸公贊

後魏胡淵臨涇人初仕夏王勃勃給事黃門侍郎魏平  
統萬淵以降款功賜爵武始侯拜河州刺史

宋胡淵崇安人聰敏能文以親老家貧授學江浙歲終  
度父母所須盡市以獻蔬食飲水躬自安之

## 周訪二

晉元帝渡江命周訪叅鎮東軍事時有與訪同姓名者  
罪當死誤收訪訪奮擊收者數十人皆散走而自歸  
於帝帝不之罪尋以為揚烈將軍



李巨二

後趙李巨事石虎為殿中御史是時豪戚侵恣賄託公  
行虎患之擢巨御史中丞特加親任自此百僚震懾  
州郡肅清

唐李巨宗室號王鳳之後為夷陵太守祿山陷京師玄  
宗擇將帥張垧言巨善騎射有謀略玄宗召至授譙  
郡太守兼御史大夫河南節度使

張軌三

晉張軌大官令張溫之子泰始初散騎常侍以才堪禦  
遠出為涼州刺史威名大著於河西

周張軌高平令張崇之子孝武時黃門侍郎以才足治  
繁出為泰州刺史政績大行於河北

兩人生平頗類次其行事如合璧然適閱濟南人物  
考又得漢菑川人少好學志識開朗仕至隴右府長  
史家無餘財惟有書數百卷其品格雅足與前兩人  
相鴈行也

王彥二

晉王彥王覽第五子惠帝時為兗州刺史趙王倫篡位  
諸王起義彥被齊王冏檄發兵策應遂立勲績惠帝  
反正擢為中護軍見王敦傳

宋王彥上黨人性豪縱喜讀韜略徽宗時為清河尉金  
人攻汴彥慨然赴闕求自試擢都統制率裨將岳飛  
等渡河擊敗金人復衛秦等州詔以八字軍赴行在  
遂為浙西淮東沿海制置使

石光二

後趙石光官幽州刺史坐懦弱徵還除左長史為石苞所殺

宋石光任岳州通判功德及民後寓大雲山卒民追慕為之立祠

晉兩錢端

一太尉王衍率衆討石勒勒輕騎追及之衍遣將軍錢端與勒戰為勒所殺衍軍大潰勒分騎圍而射之相

登如山無一免者

一陳敏作亂順陽太守張光率步騎五千討之江夏太守陶侃與敏大將錢端相距於長岐張光設伏以待之及交戰伏兵發水陸同奮賊衆大敗

劉總二

晉劉總尚書左僕射劉毅之子好學直諫位止北軍中侯

唐劉總尚書左僕射劉濟之子陰賊險譎官至檢校司

空

張威三

晉張威梁州人武都氏楊難敵攻梁州刺史吳子庠棄城去威起兵逐難敵以其地歸李蜀

隋張威文帝時為行軍總管進上柱國封晉熙郡公

宋張威成州人以身勇為後軍統制守天水屢立奇功金人陷大安軍威夜半調發鼓行而前大破金人於金斗鎮俘其將巴圖魯大將包長壽聞之宵遁

王會三

晉王會王覽之子侍御史

宋兩王會 一端明公之長子朝請大夫工花竹翎毛

藥葉枝莖嘴爪毛羽窮極精細不遺毫髮

一岳武穆下獄秦檜令親黨王會搜其家得御札數  
篋束之左藏南庫武穆子霖請於孝宗還之

李景三

晉李景李重之父秦州刺史都亭侯

隋李景開皇末為馬軍總管帝奇其壯武使袒而觀之  
曰卿相表當位極人臣後以戰功多進柱國右武衛  
大將軍賜爵滑國公

宋李景德祐元年為安仁縣令降於有元謝枋得起兵  
安仁執景斬之見陳奎傳

司馬鄴二

晉愍帝名鄴即位四年劉曜陷長安遇害

梁司馬鄴唐昭宗時為華州判官守同州梁太祖以兵



嚮長安遣張存敬攻同州鄴以城降見韓建傳

晉兩周撫

一尋陽侯周訪之子元帝時襲爵為丞相掾尋以南中  
郎將鎮沔中及王敦作逆撫領二千人從之敦敗亡  
入西陽蠻中

一沛人因天下亂自為塢主以寇抄為事襲據彭城叛  
降石勒元帝詔龍驤將軍劉遐討之撫敗走

張瑁二

晉張瑁涼州牙將從將軍謝艾率步騎三萬擊斬後趙將杜勲俘馘一萬三千級

宋張瑁以御史知宣州因家繁昌千口同居內外肅然楊傑書義居二字遺之

王渙之二

晉王渙之琅邪人嘗預右軍蘭亭醺集其詩云去來悠悠子披褐良足欽超跡脩獨往真契齊古今

宋王渙之常山人未冠擢第官至寶文閣直學士性淡

泊恬於仕進每云乘車常以顛墜處之乘舟常以覆溺處之仕宦常以不過處之則無事矣其歸趣如此

劉璠二

晉劉璠劉弘之子為順陽內史江漢翕然歸心山簡鎮荊州知璠得衆心恐百姓逼以為主表徵為越騎校尉璠亦深慮逼迫被書便至洛陽

北周劉璠廣陵人梁宜豐侯蕭脩記室參軍脩既歿降文王許其反國累月未遣璠因侍宴以齊桓存三亡

國晉文不失信於伐原為言即遣脩脩請與璠俱還  
文王不許以為黃門侍郎

晉同時兩毛寶

一從陶侃平蘇峻有功封州陵縣侯進輔國將軍豫州  
刺史以萬人守邾城後趙石虎攻之城陷赴水死一  
元帝命陶侃擊杜弢弢敗走進寇長沙獲其將毛寶  
梁堪而還見陶侃傳

考州陵侯傳起於臨湘令尋為平南參軍即平峻封

侯初無從杜弼之事則陶長沙所擒者別是一人

李義三

晉李義邨人盜起荆湖義傾家貲市兵器率鄉人擊破之闔境以安鄉民立祀於故居號其地曰太尉原北魏兩李義一鎮南長史李晃之子位司空長史一為蘭陵太守時尙朱榮舉兵入洛肆毒於河陰梁立魏汝南王悅為魏主資其士馬送之境上義擊其偏師破之

張澄二

晉張澄張裕曾祖官光祿大夫初澄當葬父郭璞為占  
墓地曰葬某處年過百歲位至三司而子孫不蕃某  
處年幾減半位裁卿校而累世貴顯澄乃葬劣處位  
光祿年六十四而亡其子孫遂昌云

宋張澄以集賢殿修撰知建康府才堪治劇甚有時譽  
尋遷戶部侍郎龍圖閣直學士

王萬二

晉王萬王戎子有美名少而大肥戎令食糠而肥愈甚  
年十九卒宋王萬浦江人嘉定進士理宗時官至監  
察御史彈劾不避權要以太常少卿致仕

劉遐三

晉劉遐易陽人值天下大亂因為塢主每擊賊率壯士  
陷堅摧鋒冀方比之關張遣使受元帝節度拜龍驤  
將軍有功封泉陵公

南宋同時兩劉遐

一為建康令聞當陽劉彥節謀攻齊高帝退以其謀密告帝使將軍王敬則收彥節殺之

一即彥節之弟為吳郡太守彥節事覺并誅

## 鄧林二

晉鄧林為龍舒長林婦病垂死醫巫皆息廬江韓友筮之使畫作野猪著卧處一宿遂瘥見藝術傳

宋鄧林福清人登第調泰和簿一時名公如朱熹呂祖謙皆與交遊凡三上書譏切朝政或曰鄧林若在中



都此謗議之府也遂授石城縣丞有虛齋集行世

李肩二

晉李肩襄平人貌質知深言必有則泰始中太子少傅  
詔領司隸校尉肩屢表讓武帝以二職並須忠賢不  
許

唐李肩宗室曹王明之孫中興初封嗣曹王銀青光祿  
大夫右武衛將軍

張夔二

晉張夔元帝時為廬江太守召陶侃為督郵領樅陽令  
見陶侃傳

宋張夔政和進士為茂名令辨民冤獄太守致疑夔投  
告身去太守勉留之諸司列薦南中清介惟夔一人  
高宗賜璽書獎賞

王華二

後趙石虎建武七年遣橫海將軍王華帥舟師自海道  
襲燕安平破之

宋文帝鎮江陵以王華為西中郎主簿帝將入奉大統以少帝見害不敢下華力請就徵帝從之曰卿復為吾之宋昌矣及即位以華為侍中右衛將軍

晉兩范廣

一大鴻臚范隆疎族隆生四歲父母俱喪孤無期功之親廣愍而養之迎歸教書為立祠堂隆好學脩謹奉廣如父卒底于成

一少府范晷之子舉孝廉除靈壽令不之官姊適孫氏

早亡有孫名邁廣負以南奔雖盜賊艱急終不之棄  
元帝承制以為堂邑令丞

晉兩解系

一吳孫皓命陶璜為蒼梧太守鎮交州晉遣九真太守  
董元拒之元有勇將解系同在城中璜誘其弟象使  
為書與系又使象乘輅車鼓吹導從而行元恐系去  
乃殺之璜遂陷交趾見陶璜傳

一濟南人由尚書出為雍州刺史揚烈將軍會氏羌叛

詔與征西將軍趙王倫討之倫嬖人孫秀與系爭軍  
事被譖遇害

李遠三

晉李遠為陰平令及李特據蜀遠仍為其僚屬見李特  
傳

北周李遠李賢之弟數從征伐並有殊勲賜爵陽平郡  
公拜尚書左僕射進柱國大將軍鎮弘農

唐李遠蜀人太和進士太中中令狐綯擬遠杭州刺史

上曰吾聞遠詩云長日惟消一局棋安能理人綯曰  
詩人托此以發興耳未必實然及遠至杭不廢政事

張亢二

晉張亢張載季弟亦有才藻時人謂載協亢陸機雲曰  
二陸三張中興初散騎常侍領制作述厯贊數篇

宋張亢臨濮人進士及第為眉州防禦使徐州總管輕  
財好施凡餽遺燕犒類皆過厚以此人樂為用

王徽二

晉王徽王澄次子右軍司馬

唐王徽杜陵人廣明初戶部侍郎同平章事黃巢入潼關僖宗出幸徽馳荊棘中墜崖谷為賊所得將授偽命徽示以足折口瘡雖冒白刃終無懼色帝嘉之詔授光祿大夫兵部尚書

庾準二

晉庾準庾亮之孫太元中自侍中代桓石虔為豫州刺史西中郎將鎮歷陽

唐庾準庾光先之子以門蔭入仕昵於宰相王紹駿至  
職方郎中知制誥又與楊炎厚善誣殺劉晏徵為尚  
書左丞素寡文學以柔媚自進甚為時論所薄

晉兩韓壽

一惠帝時為河南尹其妻賈充女也因託賈后求以女  
配華廙孫陶廙拒而不許后深以為恨故廙遂不登  
台司見華廙傳

一咸康三年慕容皝僭即燕王位以韓壽為司馬見前



燕錄

李興三

晉益州刺史羅尚為李雄所攻委城逃至江陽權統巴東遣別駕李興詣鎮南將軍劉弘求糧以供軍賦見蜀錄

唐李興安豐人父死廬墓孝誠洞達廬上產紫白芝二本醴泉湧出柳宗元為作孝門銘

金李興正大六年為耀州刺史有戰功詔賜玉兔鶻帶

金器

張寔三

晉張寔涼州牧張軌世子初以秀才為郎中軌卒州人  
推攝父位愍帝策授都督涼州諸軍事西中郎將涼  
州刺史西平公

前趙張寔皇太后張氏之姪仕劉聰為輔漢將軍聰納  
其二女為貴人欲拜寔司徒太保皆垂涕固辭身騎  
瘠馬妻乘敗車

元千戶李呼喇濟從憲宗南征攻苦竹寨先登獲宋都  
統張寔見呼喇濟傳

王臻二

晉王臻光祿勳王遐少子以外戚為崇德衛尉

宋王臻汝陰人第進士為大理評事累遷諫議大夫御  
史中丞剛嚴善決事所至有風跡

劉昶四

晉王戎嘗與阮籍飲時兖州刺史劉昶在坐籍以酒少

酌不及昶昶無恨色戎異之他日問籍曰彼何如人  
荅曰勝

南燕劉昶平原人世仕慕容氏南渡河家於北海之都  
昌後歸劉宋為北海太守

後魏劉昶宋文帝子以廢主見疑來降尚武邑公主拜  
駙馬都尉封丹陽王歲餘主薨更尚建興長公主復  
薨更尚平陽長公主

北周劉昶劉亮之子尚西河長公主大象中位柱國秦

靈二州總管封彭國公

崔洪崔廓各二俱安平人

晉崔洪武帝世為御史治書糾劾無所避朝廷憚之時  
人語曰叢生荆棘來自博陵在南為鷄在北為鷹後  
至大司農卒官子廓散騎侍郎亦以正直稱

後魏沙門達多發塚取甌得一人問其姓名死生年月  
云姓崔名洪博陵安平人死時年十五今滿二十七  
在地下凡十二年嘗見發鬼兵惟柏棺者免之自是

京師柏木踴貴見洛陽伽藍記

隋崔廓少孤貧不為邦族所齒屢逢屈辱遂入山中博覽書籍多所通涉山東學者皆宗之不應辟命終於家

高展二

後燕高展脩人仕慕容寶為黃門郎見後燕春秋

唐高展為并州判官一日見砌間沫出以手試塗老吏面皺皮頓改如少年展以問承天道士荅曰此名地

脂食之不死見雲僊雜記

張平三

前秦張平代郡人初仕石虎為部將結援於秦擢大將軍冀州牧平既跨有新興雁門諸郡衆十餘萬拜置征鎮自號并州刺史

晉徐州賊張平欲掩襲梁郡郡人惶惑將歸平豫州司馬褚翼往撫之衆心乃定見褚翼傳

宋張平臨朐人官至鹽鐵使好讀史傳遇異書或解衣

易之聚書數千卷在彭門日有侮平者數輩後被罪配京窯務平召至第設酒饌給緡錢且戒勿以前為念時人稱其寬厚

王忱二

晉王忱王坦之季子弱冠知名太元中為荊州刺史都督荆益寧三州軍事威風肅然殊得物和性任達不拘尤嗜酒一飲連月不醒每歎三日不飲便覺形神不相親



元王忱慶元節度王玉之子明敏有才識為河北河南  
道提刑按察副使多所平反



同姓名錄卷八